

F I N S K I M U Z E J I

U toku prošle godine donijeli smo više informacija o priručnicima za muzeje pojedinih zemalja koji su izašli kao vrio značajne publikacije suvremene muzeološke literaturе. Ovo se može navesti naročito za priručnike za muzeje Austrije, Beča (u dva sveska), Švicarske, Zapadne Njemačke, Istočne Njemačke, Čehoslovačke, Poljske, Francuske. Izdana su i dva međunarodna adresara za muzeje u kojima su rezimirani podaci ovih priručnika sa podacima o muzejima svih zemalja članica ICOM-a. Ovi priručnici uglavnom su rezultat akcije MDC-a ICOM-a u Parizu za evidenciju svih muzeja zemalja članica ICOM-a da bi se na taj način omogućila međunarodna međumuzejska suradnja.

Rezultat ovih inicijativa je nesumljivo i najnoviji priručnik za finske muzeje pod naslovom F i n n i s h m u s e u m s - Finski muzeji izdan 1973. godine od Udruženja finskih muzeja u kojega je učlanjeno svih 162 muzeja - umjetnički, historijski, kulturno-historijski, prirodoslovni, tehnički i specijalizirani muzeji. Dani su podaci za svaki pojedini muzej - točna adresa, informacija kada je muzej otvoren, godina osnutka i eventualno značajniji podaci o historijatu muzeja, direktor, podaci o zgradama (u koliko je spomenik kulture), konkretni podaci o muzejskim zbirkama i publikacije.

Uz podatak za 162 muzeja u Finskoj potrebno je navesti da Finska broji 4,650.000 stanovnika (Jugoslavija 20,504.516 stanovnika). Prema specijalnosti muzeji u Finskoj su 11 pokrajinski kompleksni muzeji, a 45 lokalni zavičajni muzeji. Najbrojniji su etnografski muzeji i etnografske zbirke u kompleksnim muzejima u ukupno 59. Umjetnički muzeji i galerije i umjetničke zbirke u kompleksnim muzejima ima ukupno 32, prirodoslovnih muzeja i zbirkama ukupno 15, tehničkih muzeja ukupno 10. Iznenadujući velik broj je usko specijaliziranih muzeja - ukupno 37 - za kazalište, šport, muziku, vojni muzeji, za historiju medicine, promet, bankovni muzeji, za agrikulturu i drugi.

Sudeći po navedenim statističkim podacima i navedenim podacima o historijatu svakog muzeja, u vremenu od 1828 godine, kada je datiran najstariji muzej, do 1896 godine u Finskoj je osnovano 19 muzeja. Za prva dva decenija 1900-1920 osnovano je dalnjih 23 muzeja. Između dva rata, do 1945 godine u Finskoj je djelovalo ukupno 77 muzeja. U novijem periodu od 1945. do 1973. godine osnovano je dalnjih 85 muzeja. Po tome se može naslutiti solidna tradicija muzejske službe koja se u Finskoj razvijala sukcesivno, planski i bez stihijnosti. Zato nas ne iznenadjuju podaci o bogatstvu muzejskih zbirkama, o publikacijama naročito katalozima, vodičima i časopisima. Većina muzeja ima izdane vodiče i na stranim jezicima (švedski, engleski, njemački). Jedanaest muzeja izdaju godišnjake od kojih veći broj ima tradiciju od nekoliko decenija.

Od posebnog interesa nam je informacija o udruženju finskih muzeja - zajednica svih muzejskih ustanova i zbirki u Finskoj - koja djeluje preko "Centralnog stručnog ureda za muzeje" koji je "osnovan već 1923. godine u Helsinkiju i od tada kontinuirano djeluje kao specijalizirana muzejska ustanova" (40 godina prije osnivanja MDC-a u Zagrebu). Zadatak ovog Centra je da bude oslonac muzejima za organizaciju i unapređenje rada u muzejima koji tu pomoći trebaju, za stručni, administrativnu i tehničku službu koja je od interesa za sve muzeje, za publicističku djelatnost za muzejske izložbe i organizaciju međumuzejske suradnje.

Po ovim podacima možemo naslutiti da je ovaj Centralni stručni ured za muzeje osnovan sa identičnim zadacima odmah neposredno nakon osnivanja prvog "Međunarodnog ureda za muzeje" u Parizu (preteča današnjeg ICOM-a) koji je djelovao između dva rata kao organ tadašnje organizacije Društva Naroda u Ženevi.

Ovom centralnom stručnom uredu za muzeje u Finskoj u Helsinkiu je zadatak u prvom redu - stručna muzeološka biblioteka sa službom informacija za studijsko korištenje biblioteke za koju je zadužen specijalizirani stručni kadar. Ovdje je i centralna dokumentacija i fotodokumentacija o svim muzejima u Finskoj. Solidan sistem dokumentacije u ovom centru najbolje pokazuje i publicirani priručnik o finskim muzejima sa iscrpnim podacima o svakom pojedinom muzeju i ilustrativnim prilogom koji daje i vizuelne informacije o načinu postava pojedinih muzeja.

Uz ovaj centar vezana je i izdavačka djelatnost sa posebnim i prigodnim publikacijama i sa časopisima koji kontinuirano izlaze od 1923. godine, od osnivanja ovog centra (Casopis za muzeološku tematiku), odnosno od 1954 godine (nove informacije za muzejsku službu).

U organizaciji Centralnog stručnog ureda djeluje i laboratorij za konzervaciju tekstila i specijalizirani fotolaboratorij koji vrše servisnu službu za sve finske muzeje. U centralnom uredu djeluje stručni i tehnički servis za muzejske izložbe.

Po navedenim informacijama o stručnom kadru koji u ovom centru vrši rukovodeću službu i službu stručnih informacija možemo naslutiti da je Centar opskrbljen sa stručnim i tehničkim kadrom koji uvjetuje svu navedenu djelatnost ovog centra.

Iznosimo ove podatke jer nam mogu služiti kao dragocjena informacija za komparaciju zadataka, rada i mogućnosti našeg MDC sa analognim centrima, kabinetima i institutima sa identičnim zadatacima. --